

18/11/1999

Jadikan golf umpan tarik pelancong - PM

Zulkofli Jamaludin

DATUK Seri Dr Mahathir Mohamad berkata kerajaan akan memajukan produk pelancongan berkaitan golf sebagai dasar membangunkan sektor pelancongan yang menjadi antara penyumbang utama pendapatan daripada tukaran asing.

Perdana Menteri berkata pelancong juga sangat terpicat dengan keindahan lanskap padang golf dan resort percutian yang dibangunkan di negara ini.

"Pemain golf dan pelancong dapat menikmati penginapan serta kemudahan sukan itu dalam persekitaran menarik di samping menyaksikan keindahan budaya warisan Malaysia," katanya dalam majlis meraikan pemain dari 32 negara yang menyertai Kejohanan Piala Dunia (WCG) 1999 di ibu negara, malam tadi.

Turut hadir, Menteri Belia dan Sukan, Tan Sri Muhyiddin Mohd Yassin; Menteri Perpaduan Negara dan Pembangunan Masyarakat, Datin Paduka Zaleha Ismail dan Pengerusi Jawatankuasa Penganjur WCG, Tan Sri Abdul Aziz Ismail.

Dr Mahathir berkata Malaysia kini menjadi destinasi pelancongan yang murah berikutan penurunan nilai Ringgit.

Sehubungan itu, beliau memuji jawatankuasa penganjur WCG 1999 kerana menggunakan tema khas 'Go For The Green'.

"Ia amat bertepatan dengan kehijauan hutan hujan tropika Malaysia dan pentingnya pengekalan alam sekitar.

"Tema itu konsisten dengan pembangunan mapan, prinsip yang sentiasa dipatuhi Malaysia," katanya.

Dr Mahathir berharap pelancong yang menyaksikan kejohanan itu akan meluangkan masa melawat tempat lain di Malaysia dan kepelbagaian budaya serta menikmati layanan mesra rakyat negara ini.

Beliau berkata pembangunan padang golf yang pesat dalam tempoh 10 tahun lalu, menggambarkan populariti sukan itu di negara ini.

"Sehingga kini terdapat lebih 200 padang golf di negara ini. Minat rakyat Malaysia bermain golf sangat menggalakkan.

"Sambutan menggalakkan itu membolehkan institusi dan badan korporat menaja kejohanan besar ini," katanya.

Dr Mahathir berkata adalah tidak mengejutkan jika kelab golf tumbuh seperti cendawan di negara ini berikutan meningkatnya minat di kalangan eksekutif korporat dan pelabur dalam sukan golf.

Kejayaan itu, katanya, membolehkan Malaysia menjadi syurga sukan golf di rantau ini.

(END)